

Toshkent shahri, Shayxontohur tumani  
Davlat xizmatlari markazi  
tomonidan 2020-yil \_\_\_-oktyabrda  
\_\_\_\_\_ -son reestr raqami bilan

«RO'YXATGA OLINGAN»



« TASHKENT INTERNATIONAL  
UNIVERSITY OF EDUCATION»  
mas'uliyati cheklangan jamiyati  
ishtirokchilarining 2020-yil 30-sentyabrdagi  
1-son umumiy yig'ilish bayyonnomasiga  
asosan

«TASDIQLANGAN»

«TASHKENT INTERNATIONAL UNIVERSITY OF EDUCATION»  
MAS'ULIYATI CHEKLANGAN JAMIYAT SHAKLIDAGI QO'SHMA  
KORXONA

USTAVI

Toshkent - 2020 y.

## I. УМУМИЙ ҚОИДАЛАР

1.1. «TASHKENT INTERNATIONAL UNIVERSITY OF EDUCATION» маъсулияти чекланган жамият шаклидаги қўшма корхонанинг (бундан буён матнда «Университет» деб юритилади) мазкур Устави Ўзбекистон Республикасининг «Маъсулияти чекланган ҳамда қўшимча маъсулиятли жамиятлар тўғрисида»ги Қонуни ва бошқа қонун ҳужжатлари асосида ишлаб чиқилган.

1.2. Университетнинг иштирокчилари куйидагилар:

- «Code Craft» МЧЖ;
- «Trust new invest» МЧЖ;
- «MLUNK LLC».

1.3. Университетнинг тўлиқ фирма номи:

Давлат тилида: «TASHKENT INTERNATIONAL UNIVERSITY OF EDUCATION»  
**Mas'uliyati cheklangan jamiyat shaklidagi qo'shma korxonaga;**

Рус тилида: **Совместное предприятие Общество с ограниченной ответственностью «TASHKENT INTERNATIONAL UNIVERSITY OF EDUCATION»;**

Инглиз тилида: «TASHKENT INTERNATIONAL UNIVERSITY OF EDUCATION»  
**Joint Venture Limited Liability Company.**

1.4. Университетнинг қисқартирилган фирма номи:

- давлат тилида: «TIUE» MChJ QK;
- рус тилида: СП ООО «TIUE»;
- инглиз тилида: «TIUE» JV LLC.

1.5. Университетнинг юридик манзили: Ўзбекистон Республикаси, Тошкент шаҳар, Шайхонтоҳур тумани, А.Навоий кўчаси, 2а уй.

1.6. Университет чекланмаган муддатга ташкил этилади.

## II. УНИВЕРСИТЕТНИНГ ЮРИДИК МАҚОМИ

2.1. Университет Ўзбекистон Республикаси Вазирлар Маҳкамасининг 2020 йил 23 июндаги 404-сонли Қарорига асосан ташкил этилган. Университет белгиланган тартибда давлат рўйхатидан ўтказилганидан кейин юридик шахс мақомига эга бўлади. Университет Ўзбекистон Республикасининг қонун ҳужжатлари бўйича юридик мақомдаги нодавлат олий таълим ташкилоти – Ўзбекистон Республикаси резиденти ҳисобланади.

2.2. Университет ўз фаолиятини мазкур устав ва Ўзбекистон Республикасининг қонунларига мувофиқ ва таъсис ҳужжатларига асосан амалга оширади.

2.3. Университет ўз мажбуриятлари бўйича Ўзбекистон Республикасининг қонун ҳужжатларига мувофиқ жавоб беради. Университетнинг иштирокчилари унинг мажбуриятлари бўйича жавобгар бўлмайдилар ва Университет фаолияти билан боғлиқ зарарлар учун ўзлари қўшган хиссалар қиймати доирасида жавобгар бўладилар. Университетнинг ўз хиссасини тўла қўшмаган иштирокчилари Университет мажбуриятлари бўйича ҳар бир иштирокчи хиссасининг тўланмаган қисмининг қиймати доирасида солидар жавобгар бўладилар.

2.4. Университет ўзининг фирма номи ёзилган штамп ва бланкаларга, шунингдек белгиланган тартибда рўйхатга олинган ўз эмблемасига, товар белгисига эга бўлишга ҳақли.

2.5. Университет ўз эгаллигида мустақил балансда ҳисобга олинадиган алоҳида мол-мулкка эга, ўз номидан ҳуқуқлар ва мажбуриятлар олиши, судда даъвогар ва жавобгар бўлиши мумкин.

## III. УНИВЕРСИТЕТНИНГ ФИЛИАЛЛАРИ ВА ВАКОЛАТХОНАЛАРИ

3.1. Университет Ўзбекистон Республикасининг қонун ҳужжатлари талабларига мувофиқ ваколатхоналар ва филиаллар ва бошқа алоҳида бўлинмалар тузишга ҳақли.

## IV. УНИВЕРСИТЕТНИ ТАШКИЛ ЭТИШДАН МАҚСАД ВА ФАОЛИЯТ ТУРЛАРИ

4.1. Университетни ташкил этишдан асосий мақсад илғор халқаро таълим стандартлари даражасида олий маълумотли юқори малакали мутахассислар тайёрлаш ҳамда барча турдаги

таълим йўналишларида фаолият олиб бориш.

Университет олий ўқув юрти бўлиб, асосий фаолияти олий таълим дастурлари асосида мутахассислар тайёрлаш ҳисобланади.

Шу жумладан, қонун ҳужжатлари билан тақиқланмаган бошқа ҳар қандай фаолият турларини амалга оширади.

## **V. ИШТИРОКЧИЛАРНИНГ ҲУҚУҚ ВА МАЖБУРИЯТЛАРИ**

5.1. Университет иштирокчилари куйидагиларга ҳақлидирлар:

- қонун ҳужжатларида ва Университетнинг таъсис ҳужжатларида белгиланган тартибда Университетнинг ишларини бошқаришда иштирок этиш;

- қонун ҳужжатларида ва Университет таъсис ҳужжатларида белгиланган тартибда Университетнинг фаолияти тўғрисида ахборот олиш ҳамда унинг бухгалтерия ҳужжатлари ва бошқа ҳужжатлари билан танишиш;

- фойдани тақсимлашда ва унинг тегишли қисмини олишда иштирок этиш;

- Университетнинг устав фондидаги ўз улушини ёхуд унинг бир қисмини қонун ҳужжатларида ва Университетнинг уставида назарда тутилган тартибда мазкур Университетнинг бир ёки бир неча иштирокчисига ёхуд учинчи шахсларга сотиш ёки ўзга тарзда уларнинг фойдасига воз кечиш;

- Университет бошқа иштирокчиларининг розилигидан қатъи назар, қонун ҳужжатларида ва Университетнинг таъсис ҳужжатларида назарда тутилган тартибда исталган вақтда Университет иштирокчилари таркибидан чиқиш;

- Университет тугатилган тақдирда, кредиторлар билан ҳисоб-китоб қилинганидан кейин қолган мол-мулкнинг бир қисмини ёки унинг қийматини олиш;

- жами улушлари Университет устав фондининг камида ўн фоизини ташкил этадиган Университет иштирокчилари ўз мажбуриятларини қўпол бузаётган ёхуд ўз ҳаракатлари ёки ҳаракатсизлиги билан Университетнинг фаолият кўрсатишига имкон бермаётган ёки уни жиддий тарзда қийинлаштираётган иштирокчини Университетдан суд тартибида чиқарилишини талаб қилишга ҳақлидирлар;

- Университет иштирокчилари Университетнинг таъсис ҳужжатларида назарда тутилган бошқа ҳуқуқларга ҳам эга бўлишлари мумкин.

5.2. Университет иштирокчиларининг мажбуриятлари:

- қонун ҳужжатларида ва Университетнинг таъсис ҳужжатларида назарда тутилган қоидаларга амал қилишлари;

- қонун ҳужжатларида ва Университетнинг таъсис ҳужжатларида назарда тутилган тартибда, миқдорда, усулларда ва муддатларда ҳисса қўшишлари;

- Университет фаолияти тўғрисидаги сир тутилган ахборотни ошкор қилмасликлари шарт.

Университет иштирокчиларига Университетнинг таъсис ҳужжатларида назарда тутилган бошқа мажбуриятлар ҳам юкланиши мумкин.

## **VI. УНИВЕРСИТЕТНИНГ МОЛ-МУЛКИ ВА МАБЛАҒЛАРИ**

6.1. Университет мустақил равишда ўзига тегишли мол-мулкдан фойдаланади.

6.2. Университетнинг мол-мулки:

- иштирокчиларнинг улушларидан;

- Университет фаолияти натижасида олинган фойдадан;

- жисмоний ва юридик шахсларнинг хайрия эҳсонлари;

- халқаро молия институтлари ва хорижий ташкилотлар, шу жумладан, хорижий ҳамкорларнинг моливий маблағлари;

- Ўзбекистон Республикасининг амалдаги қонун ҳужжатлари билан тақиқланмаган бошқа манбалардан шакллантирилади.

## **VII. УНИВЕРСИТЕТНИНГ УСТАВ ФОНДИ**

7.1. Университетнинг ташкил этилиши ва фаолиятини амалга ошириши учун иштирокчилар 10 000 000 000 (ўн миллиард сум 00 тийин) сўм миқдорига устав фонди шакллантирилади.

7.2. Иштирокчиларнинг устав фондидаги улушлари қуйидагича:

- «Code Craft» масъулияти чекланган жамият - Устав фонди **6 500 000 000 (олти миллиард беш юз миллион)** сўмни ташкил қилади ва бу Устав фондини **65%**ни ташкил этади.

- «Trust new invest» масъулияти чекланган жамият - Устав фонди **2 000 000 000 (икки миллиард)** сўмни ташкил қилади ва бу Устав фондини **20%**ни ташкил этади.

- «MLUNK LLC» - Устав фонди **1 500 000 000 (бир миллиард беш юз миллион)** сўмни ташкил қилади ва бу Устав фондини **15%**ни ташкил этади.

7.3. Университет давлат рўйхатидан ўтказилганидан кейин бир йил мобайнида иштирокчиларнинг ҳар бири устав фондидаги улушини тўлиқ киритади.

7.4. Пул, қимматли қоғозлар, ўзга ашёлар ёки мулк хуқуқлар ёхуд пул баҳосига эга бўлган бошқа шахсга ўтказиладиган ўзга хуқуқлар Университетнинг устав фондига қўшилаётган ҳиссалар бўлиши мумкин.

7.5. Университет иштирокчиларининг умумий йиғилиши қарорига асосан устав фондини кўпайтириши ёки камайтириши мумкин.

7.6. Университетнинг устав фондини кўпайтиришга у тўлиқ тўланганидан кейингина йўл қўйилади. Университет устав фондининг кўпайтирилиши Университетнинг мол-мулки ҳисобига ва (ёки) Университет иштирокчиларининг қўшимча ҳиссалари ҳисобига, агар бу Университетнинг устави билан тақиқланган бўлмаса, Университетга қабул қилинадиган учинчи шахслар ҳиссалари ҳисобига амалга оширилиши мумкин. Университет устав фондини Университетнинг мол-мулки ҳисобига кўпайтириш тўғрисидаги қарор бундай қарор қабул қилинган йилдан олдинги йил учун Университетнинг бухгалтерия ҳисоботи маълумотлари асосидагина қабул қилиниши мумкин.

7.7. Университетнинг устав фондини камайтириш иштирокчиларга тегишли бўлган улушларнинг номинал қийматини камайтириш йўли билан амалга оширилиши мумкин. Университет устав фондини камайтириш ва унинг янги миқдори тўғрисида қарор қабул қилинган вақтдан бошлаб ўттиз кун мобайнида Университетнинг унга маълум бўлган барча кредиторларини хабардор қилиши, шунингдек қабул қилинган қарор тўғрисида оммавий ахборот воситаларида маълумот эълон қилиши шарт.

7.8. Устав фондини ўзгартириш тўғрисидаги қарор учинчи шахслар учун устав ва таъсис шартномасига тегишли ўзгартиришлар ва қўшимчалар давлат рўйхатидан ўтказилганидан кейингина кучга киради.

## **VIII. ИШТИРОКЧИЛАРНИНГ УНИВЕРСИТЕТ ИШТИРОКЧИЛАРИ САФИДАН ЧИҚИШИ ВА УНИНГ ОҚИБАТЛАРИ**

8.1. Университетнинг ҳар қандай иштирокчиси Университет иштирокчилари сафидан чиқиш хуқуқига эга. Бундай ҳолатда иштирокчи устав фондидаги ўз улушини қолган иштирокчиларга ёхуд уларнинг розилиги бўйича учинчи шахсларга сотиш ёки уларнинг фойдасига воз кечиш хуқуқига эга.

8.2. Иштирокчи иштирокчилар сафидан чиқишида унга ўзи томонидан устав фондига киритилган улушнинг ҳақиқий қиймати натура ёки ҳақиқий қийматига тенг бўлган пул кўринишида қайтарилади.

8.3. Университет иштирокчиси ўзгартирилганидан кейин Университетнинг таъсис ҳужжатларига зарурий ўзгартиришлар ва қўшимчалар киритиши лозим.

8.4. Университетнинг таъсис ҳужжатларига киритилган ўзгартиришлар учинчи шахслар учун улар давлат рўйхатидан ўтказилганидан кейин кучга киради.

## **IX. УНИВЕРСИТЕТ ИШТИРОКЧИСИНИНГ УНИВЕРСИТЕТ УСТАВ ФОНДИДАГИ УЛУШИНИНГ (УЛУШИ БИР ҚИСМИНИНГ) УНИВЕРСИТЕТНИНГ БОШҚА ИШТИРОКЧИЛАРИГА ВА УЧИНЧИ ШАХСЛАРГА ЎТИШИ**

9.1. Университет иштирокчиларидан ҳар бири Университетнинг устав фондидаги ўз улушини ёки улушининг қисмини Университетнинг бошқа иштирокчиларига ва учинчи шахсларга сотишга ёки бошқача шаклда уларнинг фойдасига воз кечишга ҳақли.

9.2. Университет иштирокчисининг улуши тўлиқ тўланган давргача бўлган муддатда тўланган қисми бўйичагина бегоналаштирилиши мумкин.

9.3. Университет устав фондидаги улушдан (улушнинг бир қисмидан) бошқа шахснинг фойдасига воз кечиш, оддий ёзма шаклда амалга оширилиши керак.

## **X. УНИВЕРСИТЕТНИНГ ҲУЖЖАТЛАРИНИ САҚЛАШ**

10.1. Университет қуйидаги ҳужжатларни сақлаши шарт:

- Университетнинг таъсис ҳужжатлари, шунингдек Университетнинг таъсис ҳужжатларига киритилган ҳамда белгиланган тартибда рўйхатдан ўтказилган ўзгартиришлар ва қўшимчалар;

- Университет муассислари йиғилишининг Университетни ташкил этиш ва Университетнинг устав фондига қўшиладиган пулсиз ҳиссаларнинг пул баҳосини тасдиқлаш тўғрисидаги қарорни, шунингдек Университетни ташкил этиш билан боғлиқ бошқа қарорларни ўз ичига олган баённомаси;

- Университет давлат рўйхатидан ўтказилганлигини тасдиқловчи ҳужжат;

- Университетнинг ўз балансида турган мол-мулкка бўлган ҳуқуқини тасдиқловчи ҳужжатлар;

- Университетнинг филиаллари ва ваколатхоналари тўғрисидаги низомлар;

- Университет иштирокчилари умумий йиғилишларининг, Университет кузатув кенгаши, Университетнинг коллегиял ижро этувчи органи ва Университетнинг тафтиш комиссияси мажлисларининг баённомалари;

- Университет тафтиш комиссиясининг (тафтишчисининг) ва аудиторлик ташкилотининг ҳулосалари;

- конун ҳужжатларида назарда тутилган бошқа ҳужжатлар.

10.2. Юқорида айтиб ўтилган ҳужжатлар ижро этувчи орган жойлашган жойда сақланади.

10.3. Агарда амалдаги конун ҳужжатлари билан бошқача қоидалар белгиланган бўлмаса, Университет мазкур уставнинг 10.1-бандида кўрсатиб ўтилган ҳужжатларни доимий сақлайди.

10.4. Университет ҳар қандай иштирокчининг талаби билан унга ахборот, шунингдек таъсис ҳужжатларини унга киритилган ўзгартириш ва қўшимчалар билан тақдим қилиши ёки нусха бериши шарт.

## **XI. ҲИСОБ ВА ҲИСОБОТ**

11.1. Университет ўз фаолиятини мустақил режалаштиради ва ўз маҳсулоти ва хизматларига нархларни бозор конъюктурасидан келиб чиқиб белгилайди.

11.2. Университет мустақил равишда бухгалтерия ҳисобини, статистика ва молиявий ҳисоботни конун ҳужжатларида белгиланган тартибда амалга оширади.

11.3. Университет мустақил равишда Университетнинг ташкилий тузилмасини, штат жадвалини ва меҳнатга ҳақ тўлашни Ўзбекистон Республикаси конун ҳужжатларига мувофиқ ҳал қилади.

11.4. Университет фаолиятига оид ҳисоботларни қонунда белгиланган тартибда давлат органларига тақдим қилади.

## **XII. ДАРОМАДНИ ТАҚСИМЛАШ ВА ЗИЁНЛАРНИ ҚОПЛАШ**

12.1. Университет барча солиқлар ва мажбурий тўловларни тўлаганидан кейин унинг ҳисобида қолган маблағлар Университетнинг фойдасини ташкил этади.

12.2. Университет устав фондининг 15% микдоридан захира фонди шакллантиради. Университетнинг захира фонди унинг зарарларини қоплаш ва қонунда назарда тутилган ҳолларда Университетнинг устав фондидаги улушни (улушнинг қисмини) сотиб олиш учун мўлжалланган.

### **XIII. УНИВЕРСИТЕТНИНГ БОШҚАРУВ ОРГАНЛАРИ**

13.1. Университетнинг бошқарув органлари бўлиб қуйидагилар белгиланади:

- иштирокчиларнинг умумий йиғилиши - олий бошқарув органи;
- Бош директор Университетнинг ижро этувчи органи.

13.2. Университетда кузатув кенгаши ва тафтиш комиссияси белгиланган тартибда ташкил этилиши мумкин.

### **XIV. ИШТИРОКЧИЛАРНИНГ УМУМИЙ ЙИҒИЛИШИ**

14.1. Университетнинг олий бошқарув органи бўлиб Университет иштирокчиларининг умумий йиғилиши ҳисобланади.

14.2. Университетнинг ҳар бир иштирокчиси Университет иштирокчиларининг умумий йиғилишида Университетнинг устав фондидаги ўз улушига мутаносиб овозлар сонига эга бўлади.

14.3. Университет иштирокчилари умумий йиғилишининг мутлақ ваколатлари жумласига қуйидагилар қиради:

а) Университет фаолиятининг асосий йўналишларини белгилаш, шунингдек тижорат ташкилотларининг бошқа бирлашмаларида иштирок этиш тўғрисида қарор қабул қилиш;

б) Университет устав фондининг миқдорини ўзгартириш;

в) таъсис ҳужжатларига ўзгартишлар ва қўшимчалар киритиш;

г) Университетнинг ижро этувчи органларини тузиш ва уларнинг ваколатларини муддатидан илгари тугатиш;

д) Университетнинг тафтиш комиссиясини (тафтишчисини) сайлаш ва унинг ваколатларини муддатидан илгари тугатиш;

е) агар Университетнинг уставида кузатув кенгашини тузиш назарда тутилган бўлса, уни сайлаш ва унинг ваколатларини муддатидан илгари тугатиш;

ж) йиллик ҳисоботларни ва йиллик бухгалтерия балансларини тасдиқлаш;

з) Университетнинг соф фойдасини Университет иштирокчилари ўртасида тақсимлаш тўғрисида қарор қабул қилиш;

и) Университет органларининг фаолиятини тартибга солувчи ҳужжатларни тасдиқлаш (қабул қилиш);

к) аудиторлик текширувини ўтказиш тўғрисида қарор қабул қилиш, аудиторлик ташкилотлари ҳамда уларнинг хизматларига тўланадиган ҳақнинг энг кўп миқдорини аниқлаш;

л) бошқа юридик шахсларни, ваколатхоналар ва филиалларни тузиш тўғрисида қарор қабул қилиш;

м) Университетни қайта ташкил этиш ёки тугатиш тўғрисида қарор қабул қилиш;

н) тугатувчини тайинлаш ва тугатиш балансларини тасдиқлаш.

Университет иштирокчилари умумий йиғилишининг а), б), в), з) ва м) кичик бандларида кўрсатилган масалалар юзасидан қарорлари Университетнинг барча иштирокчилари томонидан бир овоздан қабул қилинади.

Университет иштирокчилари умумий йиғилишининг қолган қарорлари, Университет иштирокчилари умумий овозлар сонининг кўпчилик овозлари билан қабул қилинади.

### **XV. ИЖРО ЭТУВЧИ ОРГАН**

15.1. Университетнинг ижро этувчи органи бўлиб Университетнинг жорий фаолиятига раҳбарликни амалга оширувчи Бош директор ҳисобланади ҳамда у бир вақтнинг ўзида Университет Ректори бўлиб ҳисобланади.

15.2. Университетнинг Бош директори иштирокчиларнинг умумий йиғилиши томонидан сайланади.

15.3. Университет ва Университетнинг Бош директори ўртасидаги шартнома, Университет номидан, Бош директор тайинланган Университет иштирокчиларининг умумий йиғилишида

раислик қилувчи ёки Университет иштирокчиларининг умумий йиғилиши томонидан ваколат берилган Университет иштирокчиси томонидан имзоланади.

15.4. Бош директор лавозимига Ўзбекистон Республикаси фуқароси, хорижий давлат фуқароси ёки фуқаролиги бўлмаган шахс сайланиши мумкин. Бош директор билан тузилган меҳнат шартномасини Бош директорни сайлаш тўғрисидаги масала кўриб чиқилган Университет иштирокчиларининг умумий йиғилиши раиси ёки иштирокчилар умумий йиғилиши ваколат берган иштирокчилардан бири имзолайди.

15.5. Бош директор иштирокчиларнинг умумий йиғилиши қарори билан лавозимидан озод қилиниши мумкин.

15.6. Университетнинг Бош директори:

- бир вақтнинг ўзида Университет ректори бўлиб ҳисобланади;
- Университет номидан ишончномасиз иш юритади, шу жумладан унинг манфаатларини ифодалайди ва битимлар тузади;
- Университет номидан вакиллик қилиш ҳуқуқи учун ишончномалар беради;
- Университет ходимлари билан меҳнат шартномалари тузади ва уларни бекор қилади, ходимларга нисбатан рағбатлантириш чораларини ва интизомий жазоларни қўллайди;
- Университетнинг барча ходимлари учун мажбурий бўлган буйруқлар ва фармойишлар чиқаради;
- қонун ҳужжатлари ва Университетнинг устави билан Университет иштирокчиларининг умумий йиғилиши ва Университетнинг кузатув кенгаши ваколатлари жумласига киритилмаган бошқа ваколатларни амалга оширади.

15.7. Бош директор иштирокчилар умумий йиғилишига ҳисобот беради ва унинг олдида Университет фаолиятининг амалга оширилиши ҳамда унга юклатилган вазифа ва топшириқларнинг бажарилиши учун жавобгардир.

15.8. Бош директор Университет мол-мулкни тасарруф этиши ва иштирокчиларнинг умумий йиғилиши қарори бўйича йирик битимлар тузиши мумкин.

15.9. Университет Бош директорига Университет бошқарувида ёрдам бериш учун Молиявий директор ва Маъмурий ишлар бўйича директор лавозимлари киритилади. Ушбу лавозимларга кадрлар Иштирокчиларнинг Умумий йиғилиши қарори билан тайинланадилар. Мазкур шахслар ҳам Иштирокчиларнинг Умумий йиғилиши ҳам Бош директор олдида ҳисобдор бўладилар. Уларнинг хизмат вазифалари ва ваколатлари Бош директор тавсиясига кўра Иштирокчиларнинг Умумий йиғилишида тасдиқланади.

## **XVI. УНИВЕРСИТЕТ ФАОЛИЯТИ ЮЗАСИДАН НАЗОРАТ**

16.1. Университетда алоҳида назорат қилувчи органнинг тузилиши кўзда тутилмаган.

16.2. Университетнинг молиявий-хўжалик фаолияти устидан назорат иштирокчилар ёхуд мустақил аудиторлик ташкилоти томонидан амалга оширилади.

## **XVII. ХОДИМЛАР**

17.1. Университет маъмурияти ходимлар билан жамоа шартномасини имзолайди. Ушбу шартноманинг мазмуни, шу жумладан «Ходимларнинг ижтимоий таъминоти ва уларни ижтимоий ҳимоя қилиш тўғрисидаги низом» Ўзбекистон Республикасининг қонун ҳужжатлари, мазкур устав, шунингдек Университет фаолиятининг хусусиятлари билан белгиланади.

## **XVIII. УНИВЕРСИТЕТНИНГ ТИЖОРАТ СИРИ**

18.1. Университетнинг тижорат сири — учинчи шахсларга номаълумлиги сабабли тижорат қимматига эга бўлган, қонуний асосда эркин фойдаланилмайдиган ахборот бўлиб, ушбу ахборот Университет томонидан унинг махфийлигини муҳофаза қилиш бўйича чоратadbирларни кўради.

18.2. Тижорат сирининг муҳофаза қилинишини таъминлаш мақсадида ходим:

- иш берувчи томонидан ўрнатилган тижорат сири режимига риоя этиши;

- иш берувчининг розилигисиз тижорат сирини ошкор этмаслиги ва ундан шахсий мақсадларда фойдаланмаслиги;

- меҳнат шартномаси (контракт) бекор қилинганда ўз фойдаланишида бўлган, тижорат сирини акс этган моддий жисмларни иш берувчига топшириши ёки уни мазкур жисмлардан иш берувчининг назорати остида йўқ қилиб ёхуд ўчириб ташлаши шарт.

### XIX. УНИВЕРСИТЕТНИ ҚАЙТА ТАШКИЛ ЭТИШ ВА ТУГАТИШ

19.1. Университетни қайта ташкил этиш ёки тугатиш Ўзбекистон Республикаси Фуқаролик кодексининг 49-55-моддаларида ва «Масъулияти чекланган ҳамда қўшимча масъулиятли жамиятлар тўғрисида»ги Ўзбекистон Республикаси Қонунининг 49-55-моддаларида назарда тутилган тартибда амалга оширилади.

19.2. Университетни қайта ташкил этиш иштирокчиларнинг умумий йиғилиши қарори бўйича қўшиб юбориш, бирлаштириш, бўлиш, ажратиб чиқариш ва қайта тузиш шаклида амалга оширилиши мумкин.

19.3. Университет белгиланган тартибда ихтиёрий равишда иштирокчиларнинг Умумий йиғилиши қарори бўйича тугатилиши мумкин. Университет қонун ҳужжатларида назарда тутилган асосларга кўра суднинг қарорига биноан ҳам тугатилиши мумкин.

19.4. Университетнинг тугатилиши ҳақидаги ёзув юридик шахсларнинг ягона давлат реестрига киритиб қўйилганидан сўнг Университетни тугатиш тамомланган, Университетнинг фаолияти эса тугаган ҳисобланади.

### XX. НИЗОЛАРНИ ҲАЛ ҚИЛИШ

20.1. Таъсис шартномаси ва устав бўйича келиб чиқадиган барча низо ва келишмовчиликлар иштирокчиларнинг ўзаро келишуви йўли билан амалдаги қонун ҳужжатлари, таъсис шартномаси ва уставга асосан ҳал қилинади.

20.2. Низо ва келишмовчиликларни музокаралар йўли билан ҳал қилиш имконияти бўлмаган тақдирда улар суд орқали, Ўзбекистон Республикасининг қонун ҳужжатларига мувофиқ ҳал қилинади.

### XXI. ЯКУНИЙ ҚОИДАЛАР

21.1. Мазкур Устав Университет Ўзбекистон Республикасининг қонун ҳужжатларида белгиланган тартибда давлат рўйхатига олинган вақтдан бошлаб кучга қиради.

21.2. Ўзбекистон Республикасининг амалдаги қонун ҳужжатлари билан тартибга солинмаган масалалар, қонунда бошқа ҳоллар назарда тутилмаган бўлса, ушбу уставга мувофиқ тартибга солинади.

### ИШТИРОКЧИЛАР:

«Code Craft» МЧЖ номидан  
Таъсисчи

«Trust new invest» МЧЖ номидан,  
Бош директор

«MLUNK LLC» номидан,  
бошқарувчи



Мусаев Ф.

Эргашев Ё.

Касимходжаев У.